

# La pcd vul distgargiar fiscalmain la classa mesauna

La regenza recumonda da refusar l'incumbensa parlamentara da la fracziun cristiandemocratica

DA MARTIN CABALZAR

■ **La fracziun cristiandemocratica dal cussegl grond ha inoltrà in'incumbensa parlamentara che pretenda da distgargiar financialmain la classa mesauna tras in augment da las deducziun per las premias d'assicuranza. La regenza recumonda dentant al cussegl grond da refusar questa incumbensa. Il schef da fracziun Remo Cavegn (pcd Razén) sorta dal fatg che las finanzas dal chantun Grischun èn solidas. Dapi passa in decenni scriva il chantun numnadamain cifras nairas e dispona actualmain d'in grond agen chapital. Per via da la buna situaziun finanziaria sajan vegnidas reducidas considerablmain la taglia sin interpresas ed era las chargias tras las taglias sin relasch resp. sin ierta sajan vegnidas sbassadas, argumentescha Cavegn.**

## Fatg pauc fin nagut per las personas naturalas

Pauc u nagut n'hajan ins fin ussa fatg per las personas naturalas ed en spezial la classa mesauna haja senti pauc da questas reducziuns da la taglia, punctuescha la pcd. La classa mesauna saja anzi vegnida confruntada dapi onns cun premias creschentas da las cassas da malsauns, expensas ch'engregieschian adina dapli il budget da las burgaisas e dals burgais. Bleras famiglias e cunzunt las personas ch'educheschan sulettas na possian strusch pli pajar las premias da las cassas da malsauns. Per personas assicuradas cun entradas bassas paja bain l'agid social las premias u ch'ellas obtegnan prestaziuns supplementaras correspundentas. Per in ulteriur circol da personas datti l'instrument da la reducziun individuala da las premias (RIP). Sco che la

pcd constatescha dentant na pon dentant bleras personas betg profitar da questas mesiras.

La lescha da taglia prevesia bain ina deducziun fiscal per premias d'assicuranza. Quella saja dentant limitada e na correspundia betg a la chargia efectiva chaschunada da las premias. Quai na cuntentia dentant betg. «Per la fracziun da la pcd èsi impurtant dad uss er distgargiar fiscalmain la classa mesauna», punctuescha Cavegn.

La fracziun da la pcd vul perquai incumbensar la regenza da midar la lescha da taglia uschia che las reducziuns vengnan fixadas suandontamain: 10 000 francs enstagl 8400 francs per personas maridadas che vivan en ina lètg giuridicamain ed efectivamain nunseparada e 5000 francs enstagl 4200 francs per ils ulteriurs pajataglia e 1500 francs enstagl 900 francs per mintga uffant minorenn en scolaziun professiunala.

## Betg mo las personas giuridicas, er las personas naturalas han profità

La regenza relativescha per part la situaziun da partenza descritta da la pcd. I constettia bain ch'il chantun haja finanzas saunas. Tras l'augment pretendi da la pcd da deducir summas pli autas per las premias d'assicuranzas sa resultassian dentant en il futur er entradas pli pitschnas tar il chantun. Las perspectives finanzialas per il futur sa preschentan dentant bler mender, fa la regenza valair. Ils ultims onns n'hajan ultra da quai betg mo las personas giuridicas pudì profitar da las distgargias fiscalas. Er las personas naturalas sajan vegnidas distgargiadas considerablmain, damai che las deducziun per uffants e las deducziuns per assicuranzas èn vegnidas augmentadas sco er perquai che la deducziun per la tgira



Cun sia pretensiun da conceder distgargias fiscalas a la classa mesauna frunta la fracziun da la pcd, timunada da Remo Cavegn, sin granit tar la regenza grischuna.

FOTO O. AEBLI-ITEM

d'uffants è vegnida introducida ed augmentada. Plinavant vegnia la progressiun freida concedida gia cun ina chareschia da trais puncts procentuals. Gist quai chaschunia per l'onn fiscal 2019 ina distgargia da las personas naturalas per var 12 milliuns.

## La regenza recumonda da refusar l'incumbensa

Ultra da quai – uschia la regenza – stoppia vegnir considerà ch'il Grischun saja fitg progressiv en il sector da las reduc-

ziuns individualas da las premias e che personas en relaziuns economicamain modestas vegnian distgargiadas en moda generusa.

Cumpareglia cun differents chantuns hajan cunzunt il Grischun ed il Tessin gia oz las deducziuns d'assicuranza las pli autas. Tras questa cumparegliaziun interchantunala vegn la regenza a la conclusiun ch'in augment da las deducziuns n'è betg necessari. Da resguardar saja plinavant che l'augment pretendi avessia per conseguenza ch'il Grischun concedessia

deducziuns circa duas giadas uschè autas sco quellas dal chantun Turgovia. Dal puntg da vista da la golvaziun da finanzas interchantunala chattassia quai pouca accoglientescha, manegia la regenza.

Da l'augment da las deducziuns pretendi resultassian perditas da var 5,3 milliuns per il chantun, da 4,8 milliuns per las vischnancas e da 530 000 francs per las baselgias. Sa basond sin questas argumentaziuns propona la regenza al cussegl grond da refusar quest'incumbensa da la pcd.